



SIPA ponovo izuzela dokumentaciju iz Kliničkog centra Univerziteta u Sarajevu

Pismo anesteziologa poslalo inspektore u KCUS

Tužilaštvo Kantona Sarajevo prije dva mjeseca formiralo predmet i saslušalo 13 anesteziologa koji su poslali pismo Upravi KCUS


Dragan SLADOJEVIĆ
dragans@nezavisne.com

SARAJEVO - Pripadnici Državne agencije za istrage i zaštitu (SIPA) juče su iz Kliničkog centra Univerziteta u Sarajevu (KCUS) ponovo izuzimali dokumentaciju u okviru predmeta pokrenutog nakon pisma 13 anesteziologa KCUS kojim su Upravu ustanove upozorili na, kako tvrde, neadekvatan tretman pacijenata zaraženih virusom korona.

To je za "Nezavisne novine" potvrdio izvor upoznat sa detaljima ovog predmeta, koji podsjeća da su se anesteziolozi, između ostalog, tada požalili i na takozvane malina respiratore.

Zbog njihove nabavke, prijetimo se, podignuta je optužnica protiv Fikreta Hodžića, čija je kompanija "Srebrna malina" nabavila respiratore, federalnog premijera Fadila Novalića, suspendovanog direktora Federalne uprave civilne zaštite (FUCZ) Fahrudina Solaka i federalne ministarke finansija Jelke Milčević.

Pritom, u sklopu predmeta, u okviru kojeg je SIPA juče bilo u KCUS, provjeravaju se i navodi iz krivičnih prijavi koje je podnio Damir Koldžo, advokat porodice Palić. Podsjećamo, Sead Palić je na KCUS primljen 8. marta, a preminuo je 23. marta, u 44. godini, nakon čega je njegova supruga Mirela Palić najavila je da će tužiti KCUS i odgovorne osobe zbog, kako tvrdi, nemara u liječenju.



Pripadnici SIPA i ranije ulazili u KCUS
FOTO FAKTOR

**RANIJE
IZVRŠEN
I INSPEKCIJSKI
NADZOR**

Inače, Tužilaštvo Kantona Sarajevo je prije dva mjeseca formiralo predmet i saslušalo 13 anesteziologa koji su poslali pismo Upravi KCUS.

Jučerašnje aktivnosti SIPA izvedene su po naredbi Opštinskog suda u Sarajevu, a, kako je objavljeno, sve zbog navoda koji se dovode u vezu s počinjenjem više krivičnih djela.

Objavljeno je i da su te aktivnosti u vezi s teškim krivičnim djelima protiv zdravlja ljudi, kao i krivičnim djelom nesavjesnog liječenja, ali i zloupotrebe položaja.

Ekspresno su se oglasili i iz KCUS-a, odakle su saopštili da jučerašnje aktivnosti ne predstavljaju pretres u ovoj zdravstvenoj ustanovi, već da je samo izuzeta dokumentacija.

"KCUS obavještava da su pripadnici SIPA u sklopu ranijeg postupka došli u KCUS da izuzmu dokumentaciju koju nisu izuzeli u prethodnom dolasku. Ne radi se ni o kakvom pretresu, niti bilo čemu sličnom", saopštili su iz KCUS.

Podsjetimo, početkom maja je 13 anesteziologa s KCUS podnijelo zahtjev za raskid ugovora, a razlog za to je, kako su tada

naveli, nezadovoljstvo uslovima rada.

U PITANJU AKTIVNOSTI U VEZI S TEŠKIM KRIVIČNIM DJELIMA PROTIV ZDRAVLJA LJUDI

Tužilaštvo Kantona Sarajevo u međuvremenu je formiralo predmet, a istražiocima SIPA su već jednom ulazili na KCUS i oduzeli dokumentaciju koja će, kako se očekuje, pomoći u istrazi s ciljem utvrđivanja da li su "malina respiratori" ispravni, koliko ih je u funkciji i da li su korišteni na pa-

cijentima zaraženim virusom korona te da li je pacijentima pružena adekvatna ljekarska njega.

Osim iz KCUS, ranije su inspektori izuzeli dokumentaciju i iz Federalne uprave civilne zaštite i firme "Verlab", koja je verificovala respiratore.

Takođe, po nalogu Tužilaštva KS, federalni zdravstveni inspektori 6. aprila su pokrenuli inspeksijski nadzor na Kliničkom centru Univerziteta u Sarajevu, a izvještaj su dostavili Tužilaštvu na dalje postupanje.

Pritom, Tužilaštvo BiH je u maju uzimalo, u svojstvu svjedoka, izjave od anesteziologa koji su dali otkaz na KCUS. Ti anesteziolozi su izjave dali i u Tužilaštvu Kantona Sarajevo.